

重修兩淮鹽法志

兩淮鹽法志卷三十五

場竈門

桶價

官桶之制肇於乾隆年間裝鹽二百斤兩桶爲一引其桶由官頒式不在任意輕重每場桶價隨時軒輊官爲主持至同治光緒閒鹽政整飭鹽色復有頒發官桶之事其前後市價損益酌劑歷歷可攷也志桶價

乾隆二十三年正月運司盧見曾議詳通泰兩分司所屬各場竈鹽交易向俱用桶量收有一桶六七分及兩桶配一引之不等應請俱定爲兩桶配一引每桶各重二

百斤飭令分司較准樣桶各場俱照樣較置火烙書寫
垣名發場商量用如無印烙之桶卽係私置查獲詳究
經鹽政高恆批准

乾隆三十年十一月鹽政普福奏淮南綱鹽每引額重三
百六十四斤而自場買運至所盤駁捆築不無拋散折
耗兼之五六七八等月有例加鹵耗前任鹽臣高恆定
以每引重四百斤捆運出場至儀所仍照三百六十四
斤掣摯如有多斤扣配生引附運各場商俱有代辦之
人在場收買竈鹽名爲場商有卽領運商課本立垣代
買者有自行收買轉售運商者若輩惟知自利不恤竈

艱而竈鹽交易向係用桶量收實多滋弊亦經高恆較
准四百斤之稱又飭各分司核定每桶二百斤兩桶配
成一引合稱發運立法已屬盡善乃該場商等漸次弛
懈臣親至通泰二十三場將伊等自收竈鹽之桶用官
稱逐一稱較每桶實多一二十斤不等而伊等轉售場
商仍以官稱四百斤捆發且有一種掀手量鹽輕重鬆
實從中取利若按一綱所出一百五六十萬額數每引
多收三四十斤核計則浮收竈鹽十五六萬引各場商
竟侵漁鹽價銀十數萬兩自應亟爲整頓卽當另置二
百斤准桶傳集商竈公同較准另置桶架上安鹽漏將

鹽傾入聽其自滿以絕掀手之弊隨將架桶一併量明
尺寸飭發運司照造刊刻年月烙印分給各場遵用但
查各場商如不示以儆戒恐將來故習復萌貧竈終受
其累現飭自本年乙酉開綱起至發新桶日止查明各
垣多收實數於各場商名下照追充公失察之分司記
大過一次場員停陞倘敢抗延不繳立拏監追治罪並
將分司場員參處分賠至淮北例行併引額重七百二
十八斤而海州三場必須預行趕運堆儲日久折耗甚
於淮南是以捆運出場向例每併引重八百四十八斤
至淮所掣摯仍照額定斤數多斤配運生引與淮南無

異獨曬掃竈戶賣鹽向係用筐論擔但筐擔斤重價亦
高下不同今核定每擔除筐淨重六十斤以十四擔配
成一併引計重八百四十斤飭令場商照此收買淮商
亦卽照此摺運出場不得稍有逾越奉

旨知道了欽此

謹按鹽桶之案舊卷甚少摘此兩條發凡起例其新
案詳後

同治四年七月署鹽政李鴻章札照得淮南場鹽老堆已
空隨收隨售其鹽未經寒暑色質太嫩滴耗太多頗爲
商販之累又查各場鹽色不加講求日漸淄黑各垣商

不問鹽色高下只知大桶橫收剋扣桶價以致竈戶以尖鹽透私以次鹽歸垣鹽色日壞亟宜大加整頓卽速查照部定桶式製備桶斗五分以一分存司遴派委員四人各攜一分分赴通泰南北場會同該大使調桶較對如式者印烙發用寬大者折毀飭令另置並飭分司場官各照式自製一桶隨時較量勿任私放一面嚴飭各場按向日桶價分作上中下三等減下色之價以貼上色仍與舊價略同惟桶價長落不齊場商藉爲操縱需鹽則加價招之銷滯則跌價拒之更有乏本停收名爲坎桶者於場務大有關係應飭將該場實在桶價若

干見擬如何分別等次限一月內由司彙齊造冊申送
本署部堂逐一核定刊示分貼各場永禁坎桶之名以
期場鹽色質日佳濟銷裕課此係特札飭辦之件勿謂
整飭具文稍任延玩

同治五年十月署運司程桓生遵飭詳送通泰二十場見
給桶價清冊

通屬

枱茶場呈報該場商亭見定每桶價錢一千文李堡竈
產每桶正價錢九百文外加給煎丁錢三百五十文俟
新草登場再行酌減

角斜場呈報該場全係竈亭見定每桶提尖七分碱片
一分價錢一千五十文次鹽二分每桶價錢八百文牽
算每桶合錢一千文今於桶價之外垣商議給每桶草
本錢一百四五十文不等一俟新草價平立即刪減
掘港場呈報該場竈產見定桶價銀七錢五分合錢一
千三十文減次鹽五十文以貼尖鹽是以每桶尖鹽價
錢一千八十文次鹽價錢九百八十文碱鹽與尖鹽同
價

石港場呈報該場俱係商亭向祇尖鹽並無次碱見定
每桶價銀四錢八分合錢八百十六文

豐利場呈報該場竈鹽向係一律尖白並無次碱見定
每桶價錢八百文

金沙場呈報該場官收竈鹽一律提尖並無次碱見定
桶價錢一千文合銀七錢一分四釐

呂四場呈報該場俱係商亭全產尖鹽著名真柴見定
每桶價錢七百文

餘西場呈報該場俱係商亭向係一色尖鹽從無次碱
見定每桶價銀四錢三分三釐合錢七百八十字

餘東場呈報該場商亭均係提尖並無次碱見定每桶
價錢八百文合銀五錢五分有零

泰屬

東臺場呈報該場垣鹽見定每桶中碱價錢七百八十五文次鹽減給九折以貼上色之價加一申算給發

何埭場呈報該場窰產無分尖次見在每桶價銀五錢五分合錢八百五十文如有提清碱片每桶計銀五錢六分八釐合錢八百八十分

梁埭場呈報該場見在每桶尖鹽價錢九百二十文次鹽價錢八百三十文碱鹽價錢八百文牽算每桶合銀五錢七分

富安場呈報該場窰鹽除垣商代給量鹽辛工外無分

尖次碱見定每桶價錢八百六十文合銀五錢七分三釐

安豐場呈報該場竈產均係尖鹽並無次鹽見定每桶價錢八百八十文合銀五錢九分碱鹽照給

劉莊場呈報該場官收竈鹽見定桶價繳煎尖鹽每桶給錢六百八十文合銀四錢二分五釐盤煎尖鹽每桶給錢六百六十文合銀四錢一分二釐五毫次碱二等相同每桶給錢六百三十文合銀三錢九分三釐七毫五絲

伍祐場呈報該場竈鹽見定每桶尖鹽價錢七百五十

文碱片價錢七百十文中鹽價錢六百七十文

新興場呈報該場竈鹽見在每桶尖鹽價銀四錢二分
二釐七毫五絲合錢六百七十一文次碱減錢五十文
以示區別

草堰場呈報該場全係商亭見定每桶尖次碱一律價
錢七百四十文垣主租價車船運費一百六十五文共
九百五文合銀六錢四分六釐

丁溪場呈報該正場竈鹽見定每桶尖鹽價錢七百六
十文合銀五錢七釐次鹽價錢七百四十文合銀四錢
九分三釐碱鹽價錢七百二十文合銀四錢八分其小

海併場商亭每桶尖鹽價錢七百三十文合銀四錢八分七釐次鹽價錢七百十文合銀四錢七分三釐碱鹽價錢六百九十文合銀四錢六分

廟灣場呈報該場商竈各亭見定每桶尖鹽價錢八百五十文次鹽遞減一成碱片遞加一成

同治六年十一月運司李元華詳竊查各場桶價奉爵署憲李札司整頓經通飭畫一開報詳明立案據草堰場大使開報該場全係商亭每桶尖次碱一律價錢七百四十文垣主租價車船運費一百六十五文其九百五文等情經陳前司彙案詳奉爵署憲李批飭將來如遇

增減由司隨時詳報等因奉經示諭通飭遵守本年八月程前司訪聞草堰場桶價照原報之數擅減一百二十文並未照案稟報札飭該場查覆旋據鹽商吳榮泰等稟稱商等承辦草堰場垣本係商亭所謂商亭者其舟車牛隻亭繳等項皆商自製猶如自買之田招商耕種也乾隆嘉慶間本無桶價每桶鹽到垣酌給飯錢嗣因竈丁家大小事件必零星至商店支給故於每桶給以六百餘文以免煩瑣每年春加秋減以春閒草價稍昂秋間草豐滴厚並非輕加妄減亦向不稟明場官衙門此草堰歷年之情形也近兩年因西水下注竈丁因

苦故於濟竈外兩次加至一百四十文以示體恤此又係商竈痛癢相關之情形也今秋減者係於外加一百四十文內減去一百二十文仍將外加者留存二十文非於原定之桶價內妄減也見在岸銷疲滯售鹽維艱場產甚旺商等本既占攔收鹽又迫不容緩若不量輕成本必致誤收所關匪細爲此稟乞恩施將本年所減之一百二十文照准飭遵等情據此本司查該商等稟減桶價係爲輕本起見然今歲甫經成熟竈丁亦不得不加體恤所請減跌桶價一百二十文未免過多是否准予酌減之處仰祈批示經鹽政曾國藩批草堰場桶

價原定每桶七百四十文乃該場商未經稟明上年擅
長六十文之多已屬非是今又率請減去一百二十文
該場雖係商亭而桶價太輕竈戶不免透私所請未便
准行仰仍責令該場仍照原定每桶七百四十文給價
儻敢私自增跌卽行提商究辦並將該場官一併參處
旋經運司李元華稟稱草堰場大使德津向來辦事認
眞且該場商擅自減價曾諭令各商具稟實無徇私情
弊惟上年清水潭潰隄之後亭竈被淹銷市又疲商情
困苦委係實情可否從寬免予究治經鹽政曾國藩批
准免究

同治七年二月鹽政會國藩檄行照得通泰各場桶價經
程前署司逐場細定詳明在案查各場產數較旺滷足
草豐所有前定桶價應行略予核減以輕商本惟各場
情形不同減多則啟透私病竈之虞減少又滋偏枯不
均之弊究竟何場應減若干何場不應酌減合行飭議
札到該司即便會同瓜棧程道確體場情按場秉公安
議開摺具詳以憑查辦

同治七年閏四月運司李元華詳案奉憲札酌減桶價等
因遵經轉飭通泰兩屬詳覆核辦嗣據泰分司稟先後
議覆所議酌減桶價尙無偏枯彙開清單呈請核轉等

情又據通分司詳據各場大使先後議覆彙開清冊前來本司等綜核通泰兩屬摺開議減各數均係該分司等各就各場情形秉公議定尙屬平允理合開摺詳覆

通屬

石港場原定每桶尖鹽價錢八百十六文

呂四場原定每桶尖鹽價錢七百文

餘西場原定每桶尖鹽價錢七百八十文

餘東場原定每桶尖鹽價錢八百文

金沙場原定每桶尖鹽價錢一千文

以上五場向無次碱見照原數給發毋庸核減

豐利場原定每桶尖鹽價錢八百文嗣據加給四十文
見在實給八百四十文

枌茶場原定每桶價錢一千文見議酌減二百文實給
八百文

枌茶場之李堡原定每桶價錢九百文外加給煎丁三
百五十文見議酌減二百文實給一千五十文

角斜場原定提尖七分碱片一分次鹽二分牽算每桶
價錢一千文見議酌減一百五十文實給八百五十文
掘港場原定每桶尖碱價錢一千八十文次鹽價錢九
百八十文見議各減二百文計尖碱價錢八百八十文

次鹽實給七百八十文

泰屬

東臺場原定每桶中碱價錢七百八十文見議酌減六十文實給七百二十文

何塚場原定每桶無分尖次價錢八百五十文提清碱片價錢八百八十文前據詳減五十文當經轉報在案見議各減六十文計尖次實給七百四十文碱片實給七百七十文

梁塚場原定每桶尖鹽九百二十文次鹽八百三十文碱鹽八百文三等牽算每桶價錢八百五十文見議酌

減五十文實給八百文

富安場原定每桶無分尖次碱價錢八百六十文見議酌減八十文實給七百八十文

安豐場原定每桶尖碱價錢八百八十文見議酌減一百文實給七百八十文

劉莊場原定每桶鐵尖價錢六百八十文盤尖價錢六百六十文次碱二等相同每桶六百三十文茲查陶大使任內整頓官收每桶加錢二百文見議各減一百文計鐵尖實給七百八十文盤尖實給七百六十文次碱二等同給七百三十文

伍祐場原定每桶尖鹽價錢七百五十文碱片價錢七
百十文中鹽價錢六百七十文見議各減七十文尖鹽
實給六百八十文碱片實給六百四十文中鹽實給六
百文

新興場原定每桶尖鹽價錢六百七十一文次碱減錢
五十文見據按照伍祐八九折計算每桶減錢六十二
文計尖鹽實給六百九文次碱實給五百五十九文
草堰場原定每桶尖次碱一律價錢七百四十文見議
酌減八十文實給六百六十文

丁溪場原定正場每桶尖鹽價錢七百六十文次鹽價

錢七百四十文碱鹽價錢七百二十文見議各減八十文計尖鹽實給六百八十文次鹽實給六百六十文碱鹽實給六百四十文

丁溪場原定小海併場每桶尖鹽價錢七百三十文次鹽價錢七百十文碱鹽價錢六百九十文見議各減八十文計尖鹽實給六百五十文次鹽實給六百二十文碱鹽實給六百十文

廟灣場原定每桶尖鹽價錢八百五十文見議酌減五十文實給八百文

同治七年十二月運司李元華申報查泰屬伍祐場收鹽

桶價前於議減案內據泰分司督飭該場大使議稟該
場照原定每桶尖鹽價錢七百五十文碱片價錢七百
十文中鹽價錢六百七十文各減七十文尖鹽實給六
百八十文碱片實給六百四十文中鹽實給六百文等
情據經會棧核議開摺彙詳奉前憲臺會批各場桶價
既經該司道等飭令通泰兩屬各就場情秉公議定仰
卽如詳飭遵嗣後如遇增減應隨時詳明立案奉經示
諭通飭遵照各在案茲據伍祐場大使金敬稟稱據卑
場洋岸商人包元慶呈稱查洋岸各垣商向係就窰收
鹽以省窰力而商等重運鹽船須由洋河繞道出鹽城

關開始達運河較正倉重運既多百里之遙捆費運腳
種種加重曾於乾隆年間公稟洋岸桶價較正倉每桶
例減三十文百餘年來商竈遵守至今循舊給發相安
無異何敢再有冒瀆祇因前年西水下注各竈修隄築
壩保護亭場竈情拮据商等目擊時艱公議每桶加給
錢三十文不過暫時勉力恤竈起見上冬業經停止况
今穀賤草豐竈困已蘇而商等各垣銷市疲滯課源不
通虧累甚重爲此公叩電鑒洋岸各垣就竈收鹽向照
正倉桶價每桶減錢三十文見仍循例收買俯賜詳求
憲示遵行等情據此卑職伏查各場桶價向由場官隨

時查核增減今伍祐場洋岸各商因見在桶價詳奉大憲核定前此請減案內未經聲明洋岸桶價向較正倉減錢三十文誠恐刁竈復生覬覦由場稟請立案仍舊給發等情應如所稟立案

同治七年十二月運司李元華申查通屬枱茶場收鹽桶價前於議減案內據通分司督飭該場大使議詳該場照原定每桶價錢一千文酌減二百文實給八百文又李堡原定每桶價錢九百文外加給煎丁三百五十文酌減二百文實給一千五十文歷經遵辦在案茲據枱茶場大使何興稟稱據李堡垣商吳公遠等呈稱商等

在李堡立垣收買竈鹽價值向遵定價給發本年竈丁
所得餘息較厚兼之低亭積水久涸一律攤煎商等未
敢據行請減今租附各商見以瓜棧銷滯課項難以爲
濟而竈鹽入垣又難辭其不收勢必轉向匯借非加銀
利不可况值秋草登場產鹽正旺若仍照一千五十文
收買不獨商本有虧抑且商力不逮爲此懇請於所給
正價九百文擬請稍減五十文外仍加給煎丁一百五
十文實給錢一千文在商稍得藉以貼補匯利在竈划
計草本實有盈餘商等仍視來春場情再爲議請酌增
以期顧商恤竈於場務大局均無窒礙等情據此卑職

伏查收鹽桶價本與草價相應如遇煎草豐歉原應隨時確體場情稟明略爲增減俾商竈兩得其平今該垣商等以時屆秋草登場且低亭積水消退目前可省車渾之勞兼值棧鹽待售商課轉輸遲速不定匯借難免認利自屬實情其竈丁辦煎按照時價草價核計所得桶價尙有餘息卑職體察見在場情稍減桶價固於竈丁無損然正價須與鄰場比較未敢輕議核減其外加煎丁一百五十文溯查原案係因車渾亭場積水而設爲他場所無蓋李堡爲通屬之尾閭與泰屬富安接壤中隔土壩水有來源而無去路是以歷年辦理章程其

外加煎丁車溲辛工一項多至三百五十文減至一百五十文本屬隨時核定目今晴霽日久積水已消且值新草登場雖未便核減正價至外加車工一百五十文卑職見議酌減五十文仍留一百文以備隨時車溲連正價實給煎丁一千文俟來春察看情形再議酌增與案固無不符等情據此本司查枰茶場桶價八百文商竈相安無須更議其枰茶之李堡每桶正價九百文外加給煎丁一百五十文共錢一千五十文見值新草登場低亭水退無須車溲請將外加辛工酌減五十文仍留一百文每桶其實給錢一千文既據該分司大使等

查明所給桶價尙有餘息且請減之項本係外加應請
准如所詳辦理

謹按枌茶場之李堡桶價嗣於同治十年二月運司
方濬頤申據垣商稟稱李堡每桶正價九百文其外
加一百文既爲水大時車涇積水之用冬冷水涸無
須車涇請留三十六文按桶貼竈等情經鹽政曾國
藩批允照減

光緒二年六月前江西糧道段起等稟陳變通章程一樣
桶宜請頒發也各場垣鹽例用桶量收鹽給價以桶計
重鹽合引亦以桶計桶不畫一不特煎丁之苦樂不均

且鹽數之盈絀無定查各場樣桶向以二百斤爲准近來各場竈戶紛紛以大桶爲詞同治八年遂有伍祐京控之案雖其時暫爲了結而根本未清今職道等所到各場聞竈戶聚眾欲控皆經人勸散而採訪各場桶價不能一律此時如爲揭破竈戶刁風亦萬不可長恐礙大局而垣商大桶收鹽實亦不得其平聞昔年樣桶由運署給發領一桶動索千金今擬請飭工程局製造官桶計重二百斤以正梁之鹽較准斤兩外編號內用火印遴派妥員押解給領計淮南兩分司各給桶二十場各給桶一令各場各垣如式仿造場官較准內多加

火烙印使商人不得刊銷以後派員不時抽較如或加大官撤商革將見在場下所用之桶一例收回官桶製造工本例由場商措繳此外不多用分文庶上下之情通而商與竈各安其業不致興大獄矣經鹽政沈葆楨批所請樣桶候札工程局製造較准解赴該棧轉發應用

光緒二年七月鹽政沈葆楨札據段麗兩道稟清查鹽堆後應辦事宜八條內第六條請頒發官桶二十四號每桶斤重計二百斤如數較准編列號數蓋用火印以昭信守等情據此除批所請樣桶候札工程局製造較准

解赴該棧轉發應用外合抄章程札飭札到該局即便遵照咨取運署舊存官桶仿照式樣較准斤兩趕緊製造齊全呈候驗明由局委員解赴儀棧交收具報

光緒七年十二月通泰場商江誠大等稟淮南鹽法鹽以桶收桶憑稱較自曾文正公釐定後遵照新章較准新桶發場開用各場桶價亦由此核定十數年來從無異議丙子年段龐兩道憲赴場查堆風聞各場桶斤大小不一稟奉沈文肅公札飭工程局製造新桶二十四具每桶重二百斤頒發通泰分司發場遵用旋准工程局咨稱以桶計鹽其中手法之輕重掀斗漏下之急徐頗

有出入所有前解官桶曾否復較是否確有參差抑或木料日乾致有紳縮垣商固不可喫虧竈戶亦不可受累咨請復較五年署通分司張提取石港堆鹽復較無訛當經稟請通泰兩屬於八月初一日一律開用後卽據通泰場商吳公遠等以各場鹽質不齊桶斤未能畫一稟蒙沈文肅公批仰淮運司轉飭通泰分司確查妥議詳辦嗣據通泰分司會稟新桶小於舊桶請加開除本年通分司吉親赴各場督同場員商竈提取堆鹽火鹽核實復較由一百六十餘斤至一百八十餘斤不等八月閒葉日生等以加除有關成本稟請運憲洪遵照

定章頒發示諭並通飭各場以二百斤爲一桶當蒙將原稟發交總局札飭集商妥議伏查桶製二百斤載在志書二百年來商竈相安前次張署分司係以堆鹽先稱後較堆鹽質堅而重火鹽質鬆而輕以致前後復較斤重互有參差見在通泰分司詳請加報開除是各場議加開除之數卽各場鹽斤短絀之數亦卽商本暗虧之數商等當此萬分竭蹶之時在堆者三年方能挨重已虧於滷耗若更加報開除是再虧於斤重年復一年何所底止如以小桶爲恤竈本年潮災商等均捐資撫恤卽偶遇歉產年分無不設法賙全况官桶係奉部頒

似未可變更成憲且場竈有痛癢相關之誼大則病竈小則病商惟有仰懇憲恩俯賜遴委大員各就各場提取火鹽核實復較抑或頒發示諭並通飭各場遵照定制以二百斤爲一桶由場員督同商竈烙印發垣遵用經鹽政左宗棠批允

光緒八年四月鹽政左宗棠示商垣收鹽按照定制應以二百斤爲一桶大則病竈小則病商不可稍有歧異前次頒發各場之新桶大小未能一律以致場商嘖有煩言見在本爵閣部堂整頓淮南鹽色亟應將桶斤核准俾商竈兩得其平以昭公允嗣後悉照定制將垣內應

用之桶先由場員督同商竈較驗的確呈由分司覆較無訛一面烙印發垣一面具文專報不得溢於二百斤之外亦不得短於二百斤之中以符舊制而順商情

光緒十三年閏四月署運司程桓生申據李堡垣商吳公遠等稟以本短利微無力收運各垣皆招附商承辦銷市不暢難以轉輸附商期滿卽行停收雖場員諭令顧彥接收任催罔應推原其故非減輕桶價不可成本減輕商可不招而至查李堡桶價每桶計給八百二十文外加車海辛工二十文合計八百四十文公叩仿照角斜場桶價每桶給錢七百七十文以維場局等情當經

批飭署通分司楊運判查明該場桶價能否與角斜鄰
場一律議詳去後茲據該分司詳據枌茶場大使議詳
李堡桶價由前任何大使於同治十年詳定八百二十
文嗣於十月間詳請減存車漚辛工二十文共給八百
四十文迄今並未增減細加體察商有商艱竈有竈苦
若照角斜一律減去七十文未免過多茲擬暫減三十
文連同車漚辛工共給八百十文至收鹽一桶向給忙
工等六十餘文擬於此款內減去二十文實給辛工四
十餘文核與鄰場之價不相上下竈戶煎丁尙屬允洽
似此辦理庶商竈相安招徠較易據實詳復核轉等情

卑職查核所議尙屬平允理合轉詳候示飭遵等情到
司據此查李堡桶價向較鄰場爲多垣商不免藉口今
據該分司飭據柝茶場議減每桶三十文連同車海辛
工共給八百十文又於垣忙辛工六十餘文內酌減二
十文實給錢四十餘文商竈旣屬允洽似應俯如所請
經鹽政曾國荃批允

附鹽筐

同治十二年十二月海州分司稟查接管卷內同治八年
閒臨興場大使詳據臨浦垣商公義興許德裕等控各
竈淺筐極交陽以爭筐爲名陰爲透漏之地並據竈戶

劉紹莊楊開德劉際元趙廣遠王恆暘李朝笏以筐重
具呈經卑前場蕭大使詳奉前署憲許檄委前代理中
正場杜知事保恩詳覈鹽志及道光三十年前署憲魏
札發誌筐載明每筐六十斤成案督飭臨浦局商李恆
泰秉公覈議嗣後收鹽每筐歸局稱淨鹽五十五斤兩
筐爲一擔每擔歸淨鹽一百一十斤筐價每擔給制錢
八十文每斤合錢七毫二絲七忽零較之月報例價每
擔淨鹽九十斤給錢六十四文每斤合錢七毫一絲一
忽零覈計所多無幾商竈兩得其平惟鹽質四季輕重
不一總以此次烙發之筐平口爲度不得隨時以鹽質

輕重爭執商竈情願各具遵依切結嗣奉前憲以官稱較准每筐淨鹽五十五斤烙發到場並奉仿照淮南場垣木桶量收竈鹽章程按照竹筐斤重另製木桶十九隻一併較烙飭發各垣並留場一隻以備隨時較驗各在案行已數年相安無異乃顧輔廷等輒敢恃符出頭抹殺前案赴省越瀆誠如督鹽憲批飭本屬非是然近年垣商違制加筐情弊非弔驗筐口不足以折服該文生等之心卑職甫經到任亦無所用其回護當查顧輔廷李學品尹會甫係屬公義興公正大張森秦三垣竈丁卽經飭差將該三垣收鹽筐口弔齊與許前憲所頒

五十五斤火烙官桶當堂較驗一律平口毫無參差其
爲懷疑妄稟已可概見第既奉督鹽憲批斥惟求格外
施恩免予深究所有臨浦各垣收鹽筐口自應仍遵許
前憲定案嗣後製造新筐總以烙發誌桶較准每筐平
口五十五斤每擔除筐歸局稱淨鹽一百一十斤給制
錢八十文垣商固不准以大筐浮收竈丁亦毋許有淺
筐大把紮下窩心之弊仍不得再有碼鹽外鹽名目如
果陽奉陰違或以四季鹽質輕重不一藉口爭執擬請
治以應得之咎再查道光二十九年閒卑場安富曠等
處竈丁以商竈過糧一案越控蒙督鹽憲行運憲飭委

揚州府憲陳北掣府憲童會審詳結定案完糧申照商
竈並名不許生監充當竈丁以杜恃衿挾制奉督鹽憲
運憲批准勒石永禁在案惟迄今二十餘年屢經兵燹
碑石久已無存以致生監故態復萌應請督鹽憲運憲
重申禁令一併頒示勒石等情理合轉稟乞示經鹽政
李宗義批既據該場弔齊公義興等三場筐口當堂較
驗一律平口毫無參差該生願輔廷等輒敢恃符越瀆
實屬刁健以後自應循照舊章每筐平口以五十五斤
爲准飭令商竈一體遵守並將前督部堂示禁生監不
許充當竈丁定案重行申禁仰候頒發告示一併勒石

永遠垂示並飭准運司知照

同治十二年十二月鹽政李宗羲示照得准北臨興場筐口前經許署連判飭據局商秉公核議嗣後收鹽每筐歸局稱淨鹽五十五斤兩匡爲一擔每擔淨鹽一百一十斤筐價每擔制錢八十文商窳兩得其平所議極爲允洽又向例生監不准充當窳丁以杜恃衿挾制前於道光年間經鹽政頒示永禁惟定章日久弊竇易生因復出示勒石以昭信守爲此示仰商窳人等一體知悉自示以後務各遵照舊章每筐平口以五十五斤爲准垣商固不准以大筐浮收窳丁亦無許以淺筐掙交生

監均不得違例朦充寵丁如敢陽奉陰違一經訪聞定
卽照例究辦

兩淮鹽法志卷三十五

兩淮鹽法志卷三十六

場竈門

隄墩上

隄者所以捍海墩者所以避潮通秦之濱舊有長堰東距大海北屬於鹽城延袤百四十二里自唐以來久圯不存宋天聖三年發運使張綸用監西溪鹽稅范仲淹之議奏築長隄置閘以時啟閉宣洩詔遣中使按視命轉運使胡令儀審其可否令儀請如前議築隄自鹽城北接阜甯南抵通泰海門綿亙數百里於運河置閘納潮汐以濟漕又請開田二十頃墾耕以備增築隄成人

呼爲范公隄以仲淹力贊之也
清熙八年提舉淮南東路常平茶鹽趙伯昌奏請修葺元詹士龍令興化請發九郡人夫並築十有六月而成
明成化十三年巡鹽御史雍泰再修高宗本爲之記十五年御史楊澄又增築百餘里人呼爲楊公隄都御史張瓚記之嗣後一修於正德七年巡鹽御史劉繹又修於嘉靖十九年海門令汪有執而萬曆十年都御史凌雲翼十五年巡撫楊一魁四十二年巡鹽御史謝正蒙先後修築其可考於前代者如是

國朝屢經修建有長隄衛民居潮墩備猝警爲竈戶計者

至周且悉自咸豐年間軍興後長隄失修湖墩坍卸而
海勢東趨新漲沙灘未設墩座竈民移亭就滷舊墩縱
有存留等於虛設光緒七年間颶風大作海潮奔騰趨
避不及概付淪胥鹽政始議興修或繼長以增高或量
移而改建外湖內水可洩可防誠綢繆未雨之至計矣
爰錄舊制續以新案其舊設煙墩及新置涵洞樹株並
附於湖墩之末志隄墩

雍正十一年正月

詔以范公隄爲沿海藩籬鹽場保障急應修築令兩江總督魏
廷珍作速勘估興工并著協理河務學士西柱悉心查

辦制詔門

詳見

雍正十二年四月署江南河道總督管理鹽政布政使高
斌奏范隄逼臨江海年久殘缺甚多經大學士臣嵇曾
筠等勘得柘茶角斜二場范隄去海祇有數里最爲險
工舊隄殘塌難禦風潮酌於柘茶地方比舊隄移進三
四里許另築新越隄一道保衛民竈計築柘茶場新隄
工長五千三百五十七丈又接築豐利場新隄工長三
百八十丈再查柘茶舊隄雖多殘塌基趾猶存應同角
斜隄工一併勘估修補以爲外護計工長四千五十丈
三尺又豐利掘港馬塘石港西亭金沙餘西餘中餘東

呂四丁谿草堰白駒劉莊伍祐等場范隄殘缺應行修補並鑲築防風計工長一萬三百一十丈通計建新補舊估用工料銀二萬七千二百六十二兩八錢八分零俱於雍正十一年三四月內動支兩淮運庫銀兩經學士臣西柱率同委員陸續修築完竣又自丁谿小海草堰劉莊新興等場范隄內復查有地勢低窪工程卑矮應再需修理計工長一千四百五十二丈續估工料銀三千四十七兩八錢六分五釐零一併請於兩淮運庫動支興工修築再范隄工程因從前事無專管以致殘缺不堪今請照黃運湖河之例擇其緊要之處共長六

萬四千一百三十餘丈計程三百五十六里每里設堡夫一名共設堡夫三百五十六名每月每名給工食銀五錢每年共需工食銀三千一百三十六兩應請於運庫商捐項下支給其所設堡夫召募沿隄附近居民充當應役亦無庸建造堡房祇令其朝來暮返每日挑積土牛修補殘缺責成該地方河員查核催趨至濱海居民載草運鹽俱從范隄經過牛車踐踏碾損隄工之處甚多亦應仿照黃河隄岸成例卽於隄頂修開車道埠口責令該場員督率附近商民隨時培補以專責成而資鞏固嗣經戶部覆議查修築前項工程先估銀二萬

七千二百六十二兩八錢八分零學士西柱已於兩淮
運庫銀內動支陸續修竣毋庸議外其續估銀三千四
十七兩八錢六分五釐應如所題於運庫動支給發至
疏稱每里設堡夫一名並於隄頂修開車道埠口亦應
如所請設立分別責成

乾隆五年八月總辦江南水利工程大理寺卿汪灑等奏
通州所屬之十場范隄除呂四等八場見俱完固外惟
角斜柘茶二場范隄離海甚近內多殘缺應亟爲加築
前據眾商呈請動支運庫銀兩一律加幫情願照例公
捐還項當經前督臣那蘇圖等奏明卽行動支運庫銀

兩委員興修並加築格隄建設涵洞通共估用銀八千八百八十二兩零應飭商照例捐還歸款工部覆議查乾隆四年前江督那蘇圖等奏稱淮揚境內灣頭串場運鹽各河工程淮南商等願捐銀三十萬兩以佐大工先行借動庫項分爲五年帶完奏明在案今加幫前項隄工並加築格隄涵洞共估需銀八千八百八十二兩零應准其動項興修

乾隆六年十月大理寺卿汪灃等奏泰州興化鹽城阜甯四州縣境內舊有范公隄一道堵禦潮汐段有殘缺復多卑薄應修補完整幫築高厚其有水塘處所鑲築防

風以資鞏固共估用銀一萬八千八百八十一兩五錢
零動支商捐銀兩委員修建經部覆准

乾隆十一年三月鹽政吉慶奏兩淮竈戶居住海濱每年
伏秋大汛恆虞潮患臣前於查場時見亭場煎舍處所
間有土墩而多寡有無或遠或近並不一律詢因煎舍
離場寫遠一遇大潮猝至煎丁奔走不及卽登墩避潮
名爲避潮墩以保生命比因年深日久不加培築以致
十墩九廢每遇潮患煎丁多有損傷是潮墩之修廢竈
丁之生命繫焉正飭運司通查勘估議詳聞據通河商
眾以鹽從竈產竈賴丁煎商與竈丁實有休戚相關之

誼情願公捐工費無煩動帑並據運司查明通秦分司所屬必需修建之避潮墩共一百四十三座估需土方銀九千二百餘兩臣卽飭商人分司其事興修堅固以垂永久是年五月吉慶復奏通秦二分司所屬原議必需修建之避潮墩共一百四十三座復又續添五座各商俱已修築完固委員覆勘無異除責令各場大使將舊存有益而見係完整各墩同今次修建各墩造冊通詳存案外嗣後仍不時親加查勘如少有殘損卽隨時修補並於陞遷事故離任時一體造冊交代仍照造清冊咨部以備場員交代時考核

乾隆十一年十二月署江南河道總督顧琮奏通分司所屬十場范隄乃場竈之保障內地之藩籬必須高厚堅固方資捍禦先於乾隆七年因湖河異漲當將范隄開挖三百二十五丈迨積水洩盡卽將開挖缺口連風浪衝刷之處一併修整嗣於乾隆八年春大學士陳世倌等查勘河工水利工程以下河興鹽等七州縣濱海地方范隄東起通州境西迄阜甯縣境綿亙六百餘里經年未修殘缺頗多上年高郵三壩滾下之水由范隄開放又挖通二百五十餘丈擬加修築以資捍禦部覆范隄一帶先經大理寺卿汪灃等於乾隆五年已經修築

完固今大學士陳世倌等又稱年久殘缺未修其前工曾否修築應令查明具奏遵查乾隆五年已築之隄係按彼時殘缺處所聞段估築並未通身全修而陳世倌等於八年按臨查勘去五年修築之時又經數載其五年未修之處又復殘缺是以有年久未修勘明辦理之請查泰屬之富安等十二場通屬之餘東餘西金沙西亭石港五場范隄見俱完固無庸估修所有七八等年開挖還築二項用過夫土錢糧因彼時查勘范隄通身情形尙有殘缺應修之處留俟彙案冊報今查呂四掘港豐利三場歷年未修其柘茶角斜二場雖於乾隆五

年修過緣逼近海洋復於乾隆九十等年被潮衝刷殘缺更甚應請聞段加築以上開挖范隄還築工段並前後修築殘缺挑河建洞通其估用土方工料銀二萬五千六百七十八兩三錢零因工程喫緊先於鹽課項下動支給發委員趙辦部覆前項應築各隄及挑河建洞等工作速動支鹽課銀兩給發委員如式趙辦以資捍禦

乾隆十二年十二月鹽政吉慶奏各場避潮土墩於上年將頽者修整無者增添以期不失古人良法奏蒙

聖鑒在案不意今歲七月十四五等日猝被大潮異漲據各屬

稟稱凡竈丁趨避潮墩者俱得生全不及奔赴或另乘竹筏等類者多遇淹斃臣查潮墩旣得利濟成效則各場果有隔遠不敷之處自應再爲增築隨飭據運司遴員前往會同該分司大使詳加相度合計通泰二分司所屬議請增建潮墩八十五座估需土方銀四千三百六十餘兩通河商眾踴躍公捐臣確核所增處所頗爲斟酌得宜而眾商願捐工費情詞亦復誠懇除批俟明歲春融動工興築務期堅固永久取土宜遠不得於墩邊挖成坑塹馬道須設俾民人登降有階工完委驗確實照前責成各場大使收管一體入於交代並造冊送

部存案奉

殊批好寓賑於工亦其可也欽此

乾隆十八年鹽政普福奏淮南各場由東臺至泰壩舟行一百二十里河面廣濶並無緯道重運遲滯各商情願捐銀二萬兩修築長隄並各場通運支河緯路一律幫寬添建板橋以資利涉二十三年鹽政高恆重修之更於對岸增築南隄六十餘里並設堡房堡夫專司巡守乾隆十九年閏四月鹽政吉慶奏各場范隄堡夫向係責成河員查核催督因汛員離隄遙遠積土無有實效請責成各場大使就地管理按夫計日挑積土牛儻有些

小殘缺及水溝狼窩穽洞鼠穴令堡夫隨時修補於陞
遷事故離任時將隄工土牛造冊交代所有應給工食
亦由場員具領轉發奉

旨允行咨准工部札覆將堡夫若干堆積土牛若干按季造冊
送部備查嗣據運使盧見曾會同淮揚道錢度議詳堡
夫每名每月應積土七方五分除六臘兩月免積外餘
月俱通融積算應請將一年額土分爲兩季挑積上季
在二三四月下季在九十一月照額挑竣場員逐名
量驗如有缺少勒令補足仍於季終造冊報驗如一季
之內雨多淋卸隨時修補於冊內聲明准除一分之數

六七八三月內係海潮大汛之期如有冲刷過多應用積土在一二百方以外者隨時詳由分司勘明通報入於下季開除項下造報堡夫工食亦分爲兩季給發場員豫先核明銀數赴司具領散給如上季之士仍有不足將該堡夫革換按數勒追工食另募補充挑足不得再發下季工食經兩江總督尹繼善題乾隆二十年六乾隆二十二年五月兩江總督尹繼善題乾隆二十年六七月間雨水過多上游高寶一帶湖河處處盈滿暫將南關各壩開放以保城舍田廬但高郵五壩過水約寬至三百丈而下河出海各口門僅止數十丈隨酌開范

隄分流疏洩計開挖范隄缺口五十三處於二十一年
春還築以衛潮汐共用過土方夫工銀一千五百二十
四兩零於運庫正款錢糧內動撥經部核減實准銷銀
一千二百六十三兩五錢六分一釐

乾隆二十四年十月鹽政高恆奏明通泰二州范隄修築
工程歸於鹽務分別緩急分年商捐辦理飭據委員會
同通州分司先就通屬十場范隄見在情形察其去海
遠近以隄身單薄殘缺及迎潮頂衝應行加高幫戩與
增添防風坦坡並建石涵洞五座列爲急工共計土方
工料銀一萬八千餘兩在於運庫借款動支卽委各場

大使具領將該管內所估工段就近趨辦於是年十二月完工嗣於二十五年五月復奏泰屬隄工添新修舊並新廟二場串場河應濬處所共需銀三萬九千二百餘兩並將河身近隄之處卽以挑河之土作爲築隄土方派委各場大使具領趨辦俱於四月內先後完工所借銀兩飭商帶完歸款

乾隆二十九年十月鹽政高恆奏通泰二屬范隄向於緊要處所照黃運河之例設立堡夫給予工食挑積土方以備培補隄工之用經今三十餘年海潮遠近情形不同除豐利掘港角斜柈茶四場去海旣近又有險工仍

須照舊挑積以備緩急外丁谿小海草堰劉莊伍祐新興廟灣七場離海俱八九十里或百餘里潮汛不至土方無可動用無須領銀挑積飭將見存土方確核攤平夯礮堅實以固隄身其七場堡夫積土裁汰停止所有每年上下季及場員交代嗣後應請均免冊報惟責成場員隨時履勘凡車路埠口照舊令附近民竈填補遇有水溝窳洞等項報明確勘飭商修補仍令分司督率查察奉

旨允行

嘉慶六年五月工部札覆鹽政書魯谷呈范隄堡夫積土

於嘉慶四年七月初三四等日猝被風潮層波疊激直
拍隄頂以致隄身坍卸積土隨隄漂沒所有角斜耕茶
掘港豐利四場漂去土方准其開除

〔通州分司舊設潮墩數目〕

豐利場潮墩十座

掘港場潮墩十一座

石港場原設潮墩三座續設潮墩五座

金沙場原設潮墩十一座續設潮墩四座

又併入西亭場原設潮墩一座續設潮墩三座

呂四場原設潮墩七座續設潮墩十三座

餘西場原設潮墩四座續設潮墩六座
餘東場原設潮墩七座續設潮墩五座
角斜場潮墩八座

枱茶場潮墩十六座

秦州分司舊設潮墩數目

富安場潮墩十座

安豐場潮墩四座

梁塚場潮墩二座

東臺場潮墩十七座

何塚場潮墩二十三座

丁谿場原設潮墩三座續設潮墩一座

又併入小海場原設潮墩一座續設潮墩五座

草堰場原設潮墩八座續設潮墩五座

濰高海遠潮水不到

又併入白駒場潮墩六座內一座久廢海遠潮水不到

劉莊場原設潮墩十二座續設潮墩八座

伍祐場原設潮墩十三座續設潮墩四十九座

新興場原設潮墩七座續設潮墩十四座

廟灣場潮墩十八座

海州分司舊設潮墩數目

板浦場潮墩十四座

久被海潮衝塌

又併入徐瀆場潮墩五座

中正場潮墩一座

又併入莞瀆場潮墩一座

臨興場潮墩久圯

又併入興莊場潮墩久圯

謹按以上皆嘉慶舊志所載其淮北三場灘高海遠無虞潮患卽有異漲亦可奔避是以乾隆十一年修建潮墩三場未經議及

附

煙墩

通州分司舊設煙墩數目

豐利場煙墩六座

掘港場煙墩九座

繞范隄東
南北三面

石港場煙墩六座

三座在范隄外
三座在隄內

又併入馬塘場煙墩一座

金沙場煙墩二座

在場北
范隄外

又併入西亭場煙墩一座

呂四場煙墩六座

餘西場煙墩六座

三座在場南
三座在場北

又併入餘中場煙墩四座

餘東場煙墩十二座

在場東南
北三面

角斜場煙墩二座

一在本場八總隄內一在費家灘七總隄外

枱茶場煙墩五座

夾范隄內外東北

秦州分司舊設煙墩數目

富安場煙墩四座

在場東北

安豐場煙墩三座

一在場東一在場南一在場北

梁垛場煙墩一座

去場二十里

東臺場煙墩二座

一在三窰南一在南通梁垛官路旁

何垛場煙墩三座

皆在場東

丁谿場煙墩六座

又併入小海場煙墩二座

一在場南三里至丁谿界一在場東

草堰場煙墩二座

皆在場北

又併入白駒場煙墩三座

二在場南
一在場北

劉莊場煙墩三座

伍祐場煙墩四座

二在場南
二在場北

新興場煙墩六座

皆在場西

廟灣場煙墩五座

在場南
范隄上

海州分司舊設煙墩數目

板浦場煙墩八座

在場東南

又併入徐瀆場煙墩久圯

中正場煙墩二座

又併入莞濱場煙墩二座

在場東北

臨興場煙墩三座

在場東

又併入興莊場煙墩二座

一在場東南
一在場東北

謹按兩淮二十三鹽場大率濱海而遠近不同平險各異通屬之掘港呂四三面環海餘東餘西則北海南江泰屬之東臺東去爲丁美舍偪近海口均稱險要前明嘉靖閒屢有倭患俱設官軍竈勇分營防守我

朝武備精嚴狼山有重鎮隨地有汛防是以悉裁竈勇南北等營名目惟各場添設煙墩每墩置兵二名以時

瞭望海上然其制今多不存因誌潮墩故連類及之
又按范隄潮墩續修工程自嘉慶以來無案可稽直
至光緒七年六月風潮爲災始議修復隄墩八年四
月奉

旨舉行詳載於後

光緒七年八月鹽政劉坤一札照得通泰海三州屬范公
隄外前此築有潮墩爲各鹽場竈丁及居民人等走避
風潮之所年久傾塌以致本年海嘯風潮湧至竈丁無
處走避損傷甚多深堪憫惻而撫恤之費亦屬不貲查
從前潮墩尙有基址應卽勘明籌款修復以爲亡羊補

牢之計天變無常不可不預爲防範以重民命而維鹽務札司遵照選派妥員會同分司認真辦理具報

光緒八年二月鹽政左宗棠札淮南通泰場舊有捍海堰所以禦風潮而奠民居也先賢范文正公修築長隄於此功德在民垂之久遠今自鹽城北接阜甯南抵海門綿亙數百里皆其故地舊呼范公隄隄外竈戶環居以便取溲煎鹽之故向設潮墩數百處爲猝遇風潮竈丁暫時趨避之計是長隄衛民居潮墩備猝警所以爲捍災禦患者至周也近年是隄失修各場潮墩亦坍卸殆盡且海勢東趨新漲沙灘未曾修有墩座而向設之墩

縱有存留亦同虛設上年六月間風潮猝至竈丁無處
走避損傷極多甚至無戶報災無丁領賑慘切至此尙
復何言劉前部堂札飭就舊有基址勘明籌款修復迄
未據運司詳辦不解何以爲懷本爵閣部堂見因整頓
畿綱尤以保衛場竈爲首務所有范隄及隄外各潮墩
何處宜修何處宜改應就各場竈情形確切勘明分別
繪圖迅速稟請興辦以期一勞永逸前據胡道光墉嚴
紳作霖面稟允分認地段興修本爵閣督部堂並擬籌
提鉅款備用經費務期有著若慮工長費鉅難以同時
並舉則自北洋口至南龍港口百里上下首先築隄一

內江縣志卷之三十一
道以衛伍祐新興草堰各場俾各工接續次第舉辦亦
非不可姑存此說以資考究總之事在必行斷不許遷
延推諉坐昧機宜致貽後悔該署司即便遵照分別通
飭趕緊議詳察辦

光緒八年三月署運司徐文達詳奉憲札淮南通泰長隄
失修潮墩坍塌籌款興修等因奉此查各場潮墩前奉
鹽院劉札飭委員會同分司勘明修復卽經前司札委
同知魏源前往通泰兩屬周歷各場認真勘辦先行呈
復在案嗣據同知魏源泰分司項晉蕃稟稱草堰場擬
請添設潮墩六座伍祐場添設潮墩十一座丁谿場添

設潮墩七座新興場添設潮墩二十一座廟灣場添設潮墩十八座每墩高一丈三尺墩頂見方每面五丈墩腳見方每面十五丈如此上窄下寬俾丁民有階級可陞登避固便塌卸無虞每墩需土一千三百方每方擬給工價錢二百文每墩需錢二百六十千文其餘富安安豐梁垞東臺何垞南五場地勢較高毋庸添設新墩至各場舊設潮墩離海較遠毋庸修復劉莊場各竈亭場爲草堰伍祐所包地居腹裏亦毋庸添設墩座又據委員會同通分司吉運判稟稱海勢東遷如石港金沙二場地居腹裏數十年鮮有潮患毋庸另建外其餘七

場或須擇要增建或須修補改造俾收因地制宜之效
餘西場擬請增置新墩六座餘東場增置新墩六座呂
四場改建潮墩四座豐利場增置新墩一座改建潮墩
九座角斜場增置新墩一座修補舊墩二座柘茶場增
置新墩二座改建潮墩八座掘港場增置新墩二座改
建潮墩六座每座底四面周寬六十丈頂四面周寬二
十丈高一丈三尺及一丈六尺不等計土一千三百方
及一千六千方不等取土宜遠務在十丈以外俾免地
脈空虛方價與泰屬相同其距海較遠已成廢棄之墩
概行剔除署司綜計泰屬應添設潮墩六十三座通屬

應添應改及修補者共計潮墩四十七座除舊墩原存舊土按數扣除外共需土方十二萬六千六百六方五分三釐每方土價二百文統計需錢二萬五千三百二十一千三百六文此外委員司事薪工及挑挖附近竈地酌給價值等項並不在內似須寬爲籌備再築隄一層工費較鉅昨據嚴紳作霖來司具稟擬於伍新廟草四場中以民捐之款先行試辦一場如有成效再行推廣經鹽政左宗棠批通泰兩屬潮墩旣據飭委勘估應添應修者共計一百一十座所需經費二萬五千餘串如詳先由司庫墊發至築隄一層該署司與嚴紳會商

擬從伍新廟草四場以民捐之款先行試辦事無不可
此外均宜一律修整經費固戒虛糜亦不可徒博樽節
之名致涉率略翻貽後悔候卽酌核具奏另行飭知

光緒八年三月署運司徐文達稟竊署司詳覆遵辦通泰
兩屬避潮墩座並擬試行築隄一案業奉憲批允辦署
司遵卽星夜進行先抵東臺確切履勘伏查通泰兩屬
地處海濱風潮最易爲患先賢築隄保障允爲意美法
良近因歷年久遠海勢東趨舊隄旣傾圮居多亭竈亦
遷移日遠工長費重修舉爲難每遇風潮苦無抵禦淹
溺之慘殆不忍言去歲泰屬各場受災極重事後賑撫

所傷已多幸蒙福曜榮臨畫籌立斷費所不惜事在必
行舉海隅數百萬田廬民竈出水火而登衽席孰不鼓
舞歡欣咸頌憲恩之高厚署司博採旁諮知各場沙地
較之昔時漲多坍少見煎亭竈有在范公舊隄一二百
里外者且有場境民居卽在范隄之上若就舊趾加高
培厚未嘗不減費省力而亭場煎竈俱在隄外患仍難
防工徒虛費自應各就形勢擇地另建新隄方能悉受
屏蔽且蕩地爲煎鹽之本每因潮浸草稀果能保護有
隄此後蕩草滋生尤於供煎有益沿海地方遼濶風潮
颺忽靡常多設潮墩僅能暫救身命迅籌隄岸乃可永

衛場區惟隄工首重在土沙地土性多鬆新隄基址選擇不精層累而上土不受礮錐卽難飽此一難也新隄啟閉擬設石涵應用石料隔江採辦由場至工復須陸運牛車牽挽輾轉費力此又一難也興工以後人夫雲集近海無市米難零購夫役所食須由官備場地水鹹不便吸飲開塘蓄水均須預籌兼之野曠地窪海風尤烈人夫棲止無所搭蓋棚廠一遇陰雨積水滯蓄難消坐臥俱困此食飲棲止之難又其一也署司連日訪求利害傳聞所及尙有數端場境居淮揚之下游運水漲於上場地卽淹於下向以疏洩入海爲去路築隄以後

若遇上游盛漲運隄開壩西水下注消洩不速卽易成
災可慮者一尋常潮汛平緩無溜築隄建涵潮由涵納
洞寬三尺束成急溜早晚衝激傾跌堪虞可慮者二亭
場所重在於涵厚障之以隄涵氣隔閼恐妨攤曬可慮
者三見築隄工近連煎竈人夫應募多自外來設有奸
販雜處其間藉端營私勾串偷漏可慮者四署司職司
水利不敢畏難苟安因與員紳通盤計議黃河北徙以
後運水日弱近年下河病旱時多西水不至氾濫此後
卽須洩水歸海北洋口鬪龍港等處儘可疏消至於涵
洞之設汎漲本須堵閉潮平啟放水自無溜亭場涵氣

藉以貫通若慮工次人夫串通奸竈私販自可約束稽查不至任其弊混權衡緩急此項隄工允宜及時籌畫次第經營接續辦理查上年泰屬潮災伍新草廟四場均因當衝受害思患預防應將該四場隄岸先行興築又因該四場應築隄長約二百里同時並舉特恐地段綿長又值刈麥插秧之際集夫較難擬將伍新兩場先行倡辦伍祐歸官新興歸紳照嚴紳所議各就地勢確勘基址就地所宜妥爲相度圈築土方核實礮工款無虛糜工務實濟二場工竣再將廟草二場接續辦理此外泰屬丁谿等場或須接築新隄或可修復舊隄另由

該分司場員等詳勘稟辦又查通屬之豐利一場去海最近舊存范隄尤爲單薄近年屢次遭險皆由民竈捐修該處形勢不同又應於舊隄以內另築新隄方足以資捍衛謹擬議章程十條一隄工宜相度地勢以定基址也各隄由北而南如伍祐草堰每場約長四五十里廟灣長至七十餘里最近之新興亦三十餘里海遷沙漲舊時范隄已同虛設勢須擇地另建惟隄基去海過近恐淤深未能負重而就竈圈築又恐亭場草蕩不能盡包入內見擬各就情形於亭蕩之外擇土性堅實之處迤邐環築以期經久一隄工宜扼要先築次第辦

理也通泰兩屬范隄舊制綿亙六百餘里見在海勢遷
變如地居腹裏之劉莊金沙等場自可無庸議建而其
餘各場應行修築者仍不下四五百里之遙如果同時
並舉無論經費較多亦恐民夫人力難以兼顧查上年
泰屬潮災以伍祐新興草堰廟灣四場爲最重以地勢
而論伍新兩場尤當其衝擬就伍新兩場先行估築餘
再次第接續辦理 一隄身宜酌定高寬以資捍衛也
見在擬建新隄嚴紳原稟以身高一丈頂寬一丈五尺
爲准尙稱如式惟地勢高下不同遇有低窪之處自須
因勢加增期與隄頂一律配平以免參差 一石涵宜

閒段分設以資啟閉也新建之隄原爲禦潮而設但竈地以煎鹽爲主海水不至又恐滷氣不升未便因噎廢食見擬隔三五里建一石涵每涵洞寬三尺長七丈於盛漲時堵閉俾不至氾濫爲災而尋常潮水仍可開放通行亭場亦不至乾涸庶幾兩有裨益 一人夫宜遠近並募以資興築也此項隄工見就伍新兩處先行舉辦隄身綿長人夫自可就近受雇惟場境業煎者多各有本業斷不敷用應飭承辦官紳各自招募無分民竈遠近按方給值不稍抑勒 一方價宜明白釐定以昭畫一也此項隄工取土甚易挑築方價比之運河隄工

可以從減惟礮工局用雜費必預爲籌計而取土由近而遠築隄由卑而高其中難易不同價卽不能無等差之別若如嚴紳所稟卽於隄內開河一道則取土處所應定限制更不能聽夫自便應核實釐定以杜浮冒

一工程宜分別承辦以專責成也此項工程爲場境竈民生命所關必須事有責成方能功歸實濟新興之隄歸嚴紳任事伍祐之隄歸署司遴委妥員任其事仍於適中之地設立總局所有通工購料雇夫取土給價一切應辦事宜均由該紳委會同分司妥爲經理 一工料宜先爲籌備以資應用也新隄議建涵洞所需條石

須赴江南之洞庭山採辦轉運至工途長費鉅非三四
月不能到工此係隄工要需擬撥銀一萬兩交嚴紳領
購經過關卡准其免繳稅釐此外石礮石灰等物亦須
及早寬爲運備而駐工人夫海濱棲止無地必須搭蓋
席棚擬照河工章程每夫十名爲一棚每棚給大席十
張或小席十二張棚竹十枝此項席竹亦須早辦他如
米糧一項向係各夫自帶海隅市遠到工人夫旣無宿
糧可齋又難隨時零購擬由總局購買米石運工囤積
臨時錢米並放於方價內扣還歸款又查海水味鹹人
夫食飲不便尤宜多開水塘預儲淡水已由署司分飭

辦理 一工款宜先籌計以便撥用也此項隄工事本
重大費自繁多就嚴紳所稟伍新廟草四場工長已有
二百里見辦新興伍祐兩場應築隄長約八十餘里此
次署司會同嚴紳新往履勘照所估寬高每里約需土
五千五六百方挑築礮土局用雜費一切併計每方約
需錢四百文上下核計新伍兩場工連同建涵石料約
共需錢二十萬串除嚴紳面稱募集民捐八萬串尙需
籌擬官款十二萬串 一辦工宜無論官紳一律遴委
也每場隄工長至數十里非分段派人督率難期周密
應無論官紳商弁擇結實耐勞者遴選委用新興之工

由嚴紳分段酌派伍祐之工由印委擇人稟派薪水均由總局給發此後各場續辦之隄照此經理經鹽政左宗棠批准照辦先就新伍兩場約估需錢二十萬串除嚴紳募捐八萬串外其餘十二萬串准先提運庫所收票費撥用

兩淮鹽法志卷三十六